



Sesida dals

26 d'october 2021

Communitgà ils

27 d'october 2021

Protocol nr.

920/2021

Incumbensa da la fracziun da la PLD

concernent la realisaziun da la Lescha da polizia tenor la revisiun parziala da l'onn
2018

Resposta da la Regenza

L'art. 4 al. 6 da la Lescha da polizia (LPol; DG 613.000) cuntegna in sustegn explicit per la collavuraziun tranter la Polizia chantunala e las vischnancas e pia in sustegn per il sistem dual. Per in sistem dual dovri dentant diversas repartiziuns da las incumbensas. La cunfinaziun da questas incumbensas chaschuna la finala adina puspè discussiuns. En la debatta dal Cussegl grond (PCG 2018/2019, p. 87) ha la Regenza precisà latiers, che «sche nus vulain però mantegnair quest sistem dual che corresponda er a Vossa voluntad, lura datti cunfins ed ad in tschert punct stuain nus lura trair quest stritg.» Quest sustegn per il sistem dual vala anc adina e tant la Regenza sco er il Departament da giustia, segirezza e sanadad ageschan correspundentmain. Tuttina pon ins leger sin pagina 54 dal rapport «Polizia dal Grischun 2015plus» – ch'è vegnì approvà ils 22 da settember 2015 da la Regenza – ch'i fiss da beneventar, sche las polizias communalas restantas (cun excepziun da la Polizia da la citad da Cuir) pudessan vegnir abolidas a media vista cun soluziuns da contract. Da promover che la Polizia chantunala surpiglia per contract incumbensas da las polizias communalas, corresponda damai a la strategia da la Regenza. La Regenza constatescha pia, ch'il DGSS na fa resp. n'ha fatg naginas interpretaziuns inexactas dal rapport da polizia 2015.

Il stritg menziunà qua survart vegn tratg en spezial là, nua che la basa necessaria manca en il dretg vertent. Sche la basa necessaria na manca percenter betg, ston esser ademplidas las premissas tenor il dretg polizial. Tenor l'art. 5 al. 4 LPol das-

tgan las cumpetenzas numnadamain mo vegnir delegadas, sche las premissas e las structuras èn dadas per quai. Ultra da quai dovri per ina tala delegaziun – ch'è da reglar cun in contract e che dovra uschia il consentiment dad omaduas partidas – adina raschuns objectivas e raschunaivlas. Ina delegaziun da las incumbensas tenor l'art. 5 al. 4 LPol na datti perquai betg, sch'ina tala delegaziun è incunvegna e sche las premissas organisatoricas sco er las premissas persunalas na vegnan betg adempridas. Sche las incumbensas da la Polizia chantunala vegnan surdadas per contract ad ina polizia communal, sto la Regenza ultra da quai avair en egl la strategia poliziala generala.

Sche vischnancas – sa basond sin l'art. 5 al. 4 LPol – han ina dumonda concreta, per la quala exista la basa necessaria en il dretg vertent, pon ellas drizzar la dumonda al DGSS cun inditgar las explicaziuns correspondentas davart las premissas menziunadas en l'art. 5 al. 4 LPol. Silsunter examinescha il DGSS la dumonda.

La Regenza constatescha sin basa da las explicaziuns qua survart, che la revisiun parziala da la Lescha da polizia da l'onn 2018 vegn exequida ed applitgada correctamain e che naginas incumbensas correspondentas dal Cussegl grond na vegnan ignoradas.

Sa basond sin questas explicaziuns propona la Regenza al Cussegl grond d'acceptar questa incumbensa ed il medem mument da la stritgar sco liquidada.



En num da la Regenza

Il president:

Dr. Mario Cavigelli

Il chancelier:

Daniel Spadin